

李龍集

署 趙誠格



寄窩鈔存自序

寄窩者、養園子寄居之窩也。家貧親老。糊口硯田。特取館穀養親之義。故自號曰養園也。家在三汊河西青蓮泊之西南隅。又自號曰西青居士。園在宅之東偏。因樹爲屋。得日之光。東方一白。卽起課讀。因又號曰東白也。余家世清貧。賴先君教讀數十年。家以小康。因顏其堂曰食硯。余承先志。葺東廂茅屋三間。爲蓉鏡軒。額曰食硯漱經龕。又以從事鳴塗。有唐突鍾張。盜竊義獻之名。叩門求字者。踏穿戶限。床榻牖壁。墨瀋殆遍。故又號曰墨饗子也。戊子七月。洪水懷襄。携家北上。依劉而食。賃屋於八角台鎮。養親課士於其中。此寄窩之所由昉也。憶自束髮受書。亦嘗有志顯揚矣。當賈董對策之年。正班揚獻賦之日。雖無鄧仲華諸葛孔明之略。頗有范希文司馬君實之心。虞卿固不欲以窮愁終老。王曾又豈以溫飽自足乎。乃以羅隱數奇。劉蕡命蹇。既不能如賈君房語妙天下。又不能如張平子才冠當時。家無張季南司馬長卿爲郎之貴。朝無皇甫規東方曼倩自薦之疏。上無黃瓊楊厚之徵。下無毛義鄭

均之望。未必巢由許我。忝言伊呂笑人。擬此身將與漆園叟爲朋。悔此生已爲王半山所誤矣。加以長孺太戇。老瑀性剛。雖無董宣強項之聲。已有次公寡和之目。彼許敬不撓於權貴。沈景以禮折王侯。包拯之笑比河清。唐介則直震朝野。以及周榮之直筆。李邵之獨行。何敞之讜言。韓稜之正色。舉凡不宜於世。見忌於時者。皆爲性之所近。勢不能移。意以爲天下事。尙可圖。有爲者亦若是耳。於以知銅臭之司徒可恥也。由竇之尙書尤可恥也。紙糊之閣老可羞也。犬吠之侍郎尤可羞也。人以爲讀書萬卷。不如積產千金。我以爲韋布而榮。勝於簪纓而辱。孰輕孰重。何去何從。四十年來。浮雲春夢。身爲形役。志與願違。問我生平。所爲何事。不惟此心難同乎俗。卽古人亦有難強人意者。如楊震之事鄧隲。李固之事梁商。而我不願崔駟之戒竇憲。朱穆之戒梁冀。而我不能。鍾皓之荐陳寔。左雄之荐周舉。而我無其遇。班彪之佐竇融。杜甫之佐嚴武。而我無其階。匡衡之疏天變。郎顗之對災異。我以爲多言。桓譚之辨纖緯。崔寔之論時政。我以爲多事。吳樹崔琦之獲罪。我以爲太剛。王章陳授之招尤。我以

爲過激。趙岐之棄官逃歸。而我以爲晚。爰延之託疾辭去。而我以爲遲。讀莊周却聘對使之言。我以爲游戲。繹魏桓辭徵對衆之語。我以爲好名。在彼者皆我不願。在我者皆彼不爲。身世迍邐。職此之故。被逮以來。稍知自悔。弔周文以演易。懷黃霸而授書。龍門著史而未終。鄒陽有書而難上。已作逃亡之張敞。旋爲大索之庾冰。幸天壤尚有朱家。惜坐客猶留丁牧。望門之投。旣安張儉。徒中之荐。敢擬龐參。彌正平投刺無門。馬賓王風塵久溷。狄懷英望白雲而思親舍。沈初明奏通天而念東還。願爲孫綽之遂初。心切安仁之養母。此靖節歸來之賦。薛逢老去之吟之所爲作也。自以行年長大。所懷萬端。過眼歡場。名心灰冷。無復元龍豪氣。遑云文舉冰稜。有懷鍾瑾。洵皂白之不分。竊慕林宗。聊游優以卒歲。恥說張華之博物。嗤言潘岳之閒居。韋著藉講授藏身。袁閔以耕學爲業。旣不欲學。周彥倫盧藏用之爲捷徑。客更不願如殷深源房次律之爲兩截人。彼樊英見責於張楷。周黨見詆於范升。固吾所不忍聞。卽黃允滋諂於符融。郭泰見戒於徐穉。亦吾所不樂聞也。交游若崔州平法孝直。則不可知。

李 龍 集
但求以茅容爲友。以仇香爲師。可矣。期許若陶彭澤。章蘇州。則不敢必。但得爲韓福前身。爲法真後身足矣。昔范滂稱郭有道云。隱不違親。貞不絕俗。郭正稱法高卿云。名可得聞。身難得見。吾將奉二子之言。而遵行不逮也。屠維赤奮若春暮。執經者僅四五人。講學之暇。頗有餘力。因拾經籍唾餘。及贈答書稿。隨筆鈔錄。裝成卷帙。爲寄窩鈔存若干首。因自述其顛末如右。

光緒十五年三月朏日龍石墨齋子自序於食硯漱經龕之東白書塾

與饒從五翰編書

丙戌夏仲津門作別掛席分飛瞬息千里神馬尻輪隨風南下盱江西注瀋水東流嶺樹萬重雲山千疊雙輪日月天各一方風雨連床薜蘿在目魚沉雁息幾度東風地北天南引領無極已丑春闈揭曉拜讀千佛名經知大兄丹梯獨步供職清華以玉筍班頭作金帶圍首入奪講經之席出分蓮炬之光蓋猶是雙峰先生家法也昔賈生入召文帝爲接席之談嚴徐奏書武帝歎相見之晚以老兄心是屠龍手爲天馬文則頡頏兩漢詩則伯仲三唐今日爲得人慶固爲天子好門生異時作賢臣頌預卜國家賢宰相矣弟水已還鄉雲難出岫京華翹首恍如春夢枯管殘編與爲寢饋泥塗終老寄志烟霞回憶杜牧青年之日亦嘗作司馬壯遊之思家無儋石而有膏澤四海之心身在韋布而有衣被千秋之志覺深源可以不起而賈彪不可不行者撫躬自揣今是昨非閉戶家居萬事灰冷薛逢旣吟老去王粲從軍之行久不作矣蓋身與世爲轉移道與時爲變通上不優孟秦漢下不印板程朱幸則爲謝

安石不幸則爲房次律陽鱗熱中叔疑龍斷皆非鄙人所敢希也王文成句云一寸未成真
事業百年虛負好光陰弟之謂歟前在都門幸被容接翹瞻山斗高誼雲天掃去浮塵頓開
茅塵叔度千頃波元龍百尺樓不是過也弟以韓三下士溷跡漁樵而中朝當路尙有故人
蒹葭玉樹倚賴爲榮異日白髮彭宣重來鄴下司馬之門能容狂叟舊交之位猶設馬援老
饕入座大嚼登筵廷尉結轡寵在王生平原執鞭侯嬴叨幸多矣夫唐堯在上不參二八固
爲管夷吾之所恥而冀階松棟不遺華祝衢謳潁水箕山共戴星輝雲爛上有風力下有靈
陶在天在田各行其是乘車戴笠應無貿賁之嫌宮錦漁蓑庶免駕言之恥桃潭千尺明月
一天鴻雁不來珊瑚誰寄屋梁月落時見顏色江雲渭樹何日相忘五鳳齊飛二龍競躍金
芝瑤草獻瑞華萃順風鴻毛彙征叶吉努力加餐勉事聖朝臨潁神往不盡欲言

寄文雪門啟

都門判袂燕粵隔絕天水一方雲山萬疊春來春去金玉音疎月缺月圓珊瑚誰寄白雲天

未兩地花開勞燕分飛河梁空悵薜荔在眼苔岑味同風雨連床時縈魂夢弟以流亡吳漢
窮守茂陵洛陽道中已淪蘇季新豐店裏誰識馬周自分罪餘終爲餓隸猥蒙不棄惠顧垂
青囊下焦桐中郎傾耳自慚駑劣得遇孫陽昂首長鳴常呼負負援手絕壑躋彼康莊南州
季子載以後車東海先生導之前席落魄狂傖誠爲逾量寄人籬下託鉢經年馮謹無能田
需莫展伯鸞餘熱仲叔累人仁祖不來胡奴謝我一身飄泊四海無家嘖蹴嗟來黔婁所恥
彼亦何人鵝鷺爭食堂堂七尺自顧赧顏甲申夏五李子幼渠憐我窮途推誠薦剡牧門比
部延作西賓自食其力聊以解嘲竊自思維擲得館金圖報居停區區之私稍答萬一詎以
劉巖福薄束修無幾枕上烟雲過口無餘酬報之心終成畫餅丙戌春杪奉到母召倚閭念
切望眼欲穿烏哺思歸流涕自咽行李倉皇匆匆就道中朝故舊概不辭行蓋在鄙人實迫
母命而在雲老必謂寡情略心論跡能勿介懷揆之鄙衷當不其然夫淮陰一飯矢報他年
淵明一食相期畢世銜環結草今豈無人雲老意氣高厚難酬弟獨何心而能忘此東歸以

後親舊遠來雲老高風嘖嘖人口家居之暇不時感激燈前繞膝稱道勿絕子子孫孫世無相忘丙戌丁亥兩致問書一紙之裁皆不見答或者雲老心存芥蒂鄙夷不屑或洪橋有誤明珠暗投魚沉雁息道遠難知叔度量深必能原鑒雪門知我終須代解疑團也弟遭家不造流離蕩析昊天不弔毒我慈顏苦塊餘生覲顏無地俟禪除服闋少有川資必當西上負荆請罪踵門叩謝也天涯知己數載睽違渭樹江雲海天無極雁去燕來不勝依戀臨穎荒迷不知所云

答丹崖子啟

初二日申刻張際兄到櫃索觀來札並詢張際兄口述云云知宵小鬼域局騙之勢成矣事已至此萬難罷手非我好事激之使然未識衙署批示若何以呈而論似無罅漏驗糧交價原非矯強現在糧樣陳腐不堪彼已無辭我翻有據糧樣不符何以交價揆之情理差堪自信特恐被告先入關說藉重孔方阿堵一言重於九鼎左券在此左袒在彼於彼於此未可

逆料陰人叵測不可不防以鄙愚見事不宜遲鬼崇之謀顯然敗露我若退步彼必爭先但看批出可猜八九作計東行不可不預黃帝有云操刀必割今日之事豈不謂然臘卯之失誤在心活我之脚根已占十分偶一轉環陟然撒手寬仁大度人所共知夫下手不太毒作事不太盡固我之大仁大義留有餘地也乃小人不以君子爲德而君子反墜小人之術一誤再誤今是昨非覆轍前車可爲殷監且以君子之心與小人之腹忠厚刻薄毫厘千里養癰貽患實由於此蓋斷不勝慈終歸不斷仁能昏智必至累仁賢者受欺多中此病東仲思之然耶否耶况照帖盤糧驗糧交價糧樣太低其曲在彼其直在我又何須人之左右之也至於大義滅親一節似乎論不到此夫聖賢處事胥基仁義即姦雄豪俠亦無不以義爲名號者惟龍斷鄙夫趨利如鶩並不知義爲何物此等賤丈夫海上逐臭小兒之行吾恐蹠蹠不爲直趙君都張子羅之罪人矣而欲藉口於石碣也得乎昔李白謁時相自稱海上釣鰲客時相問以何物爲餌曰以天下無義丈夫爲餌尤西堂論之曰李青蓮非真狂者貝錦之

詩云投彼豺虎豺虎不食夫無義丈夫投之江湖恐魚鰲不食其餘而謂巨鰲食之乎西堂之論固屬刻覈但爲無義丈夫開却一條生路尙不如爲太白作釣餌俾葬於江魚之腹也蓋我輩處事視義太重每爲無義子所弄倘大義滅親者仍託名爲親而來務須立定脚根切不可爲所轉移也矧此行恐已作矣財已虧矣倘再以陳朽低貨敷衍搪塞無論誰何不可輕易鬆口卽令使彼十分滿意亦萬不能以我爲樗蒲隊中之善士也潢南白局歷有年所若能因我永行停止亦是好事此風一熾伊于胡底昔晉末盧雉風盛君家盤龍阿仲一擲百萬此等局面殆其似之臘六兩卯一樣葫蘆一則無糧哀懇合回一以朽糧藉口抵賴總之不過白手得錢此等手段已使慣熟今大家合局俱向我來居心不良已可概見市井狡獪甚於賭匪切不可稍存餘戀冀再作同局之馮婦也尤可慮者向來官紳勢如冰炭我輩一有舉動官府未免多心况我素非狗洞中人彼堂上肉傀儡安能爲我所頤指乎又富商大賈釀金獻芹與門丁拜弟兄爲奴崽通慶賀社鼠城狐螢營狗苟袖內出青蚨作鷗

鵠笑者且比比也我輩遇事須自作主張萬不可輕聽輕信爲彼所賣也凡闖闖窮波斯皆欲食唐僧肉者而假羊叔子之門面暗裏鳩人者亦復不少尤不可以其自號讀書種子卽引爲箇中人遽以肝胆相照也交易市塵黨錮成風鬼魅伎倆牢不可破外來之客入網難逃向無幾人出其圈套弦高杳矣鴟夷子皮亦不復作當此之時求一計然呂不韋者不可得況於貨殖中求端木乎紅塵穰穰何處是插脚地也我何如人而日與市儈梟獍之徒鬪智慧角雌雄耶天壤甚大何地無財福貴鉅萬無之不可以財爭氣竊爲不取且源記同人無一故舊品行心術俱不可知執事之人一味陰險如此行爲焉有好事借箸而籌誠難爲計未識尊意以爲何如鄙人耄矣智慮短淺苦塊之餘方寸已亂野人獻曝敢布區區臨穎神馳諸維珍重

附啟者凡事成於果斷敗於姑息一有顧戀必受其欺今日之事似亦無所顧戀矣蓋人之所異於禽獸者以其存心也以其有倫理也若滅親是無倫理無倫理是無人心心旣無矣

安得有義親已滅矣而又不獲於義誠不知其可也夫滅親而義君子猶或非之況於不義而爲之乎此其不足顧戀者也至源記執事某尤不足道凡食人之食不忠人之事者與無父無君等人而負恩天良喪盡矣夫犬飼於人必不反噬繼見者猶知搖尾以其不忘恩也人而負恩直犬之不若矣此紀文達所以爲義犬四兒立墓也

三七祭先妣潘太孺人文

嗚乎吾母往矣兒不復聞吾母罄歎母亦不得見兒朝夕趨侍也嗚乎痛哉籲地號天無所逮及言念及此忽然忘生母生七十有九年大抵歡娛之日少憂患之日多也不孝家夙食貧先君教讀於外吾母持家於內粗糲自適井臼躬操勞苦拮据腸斷心碎如是者有年所痛者兒罪深重毒我先君肝腸迸裂死不足贖賴吾母精神尙健少慰晨昏但以兒賦性儻慕嗜酒放浪數年在外使母心痾雞豚奉缺定省久疎門閭之望決嘗欲穿吾母爲兒心力竭矣如是者又有年兒復不才爲飢債所趨覓食昌圖不自檢束得罪當道被逮遣戍蕭關

一去未卜生還倘有不測兒與吾母生死訣矣猶幸流寓京師不果西行兒有定方母心稍慰丙戌夏仲由京旋里一家環哭如獲再生母撫兒臂而泣曰不孝子遠遊忘親使我心惻汝伯父伯母相繼棄世母之瀕死者數矣而後乃今但我一口氣萬不令不孝子出門去也嗚乎吾母言猶在耳每一念及皆兒所椎心泣血號涕欲絕者也去歲臘初母少不豫旋即霍然一日撫兒而告曰汝自避水北來四易寒暑賃屋而居依人而食日積一日年復經年吾爲汝計何以聊生况母年老矣氣血已衰倘有不虞急難爲情南旋之費正復不菲母不欲以遺骸遺汝累也言之若甚悲者兒以爲年老人三思過慮往往有之未始以爲憂也孰意母竟捨不孝而溘然長逝乎嗚乎已矣母與不孝長此別矣地久天長何日是相見期耶嗚乎痛哉言有窮而情不可終母其知也耶母其不知也耶嗚乎哀哉尙饗

喪先妣啟祭文

嗚乎吾母委不孝而去之已兩易朔矣兒孽深重禍及慈幃負地辜天弗克自贖熒熒在疚

罹此憫凶宇宙雖寬容身無地兒復何以自立於人間世哉兒弱冠失怙終鮮兄弟形單影隻強自支持母子孤零相依爲命乃以家本寒微力難自給就館於外覓食養親偶一歸來悲喜交集嘗撫兒而泣曰人生樂事半在家庭百年歲月歡聚無幾有兒在側菽水亦甘是知天性之真不離於寒士人倫之樂無過於貧家不孝子終年負笈糊口四方雖使我重茵而居列鼎而食吾不願也言之嗚咽不能成聲數年以來母心瘁矣母力疲矣母之血氣亦就衰矣要皆不孝兒浪遊廢養不能承色笑慰親心之所致也嗚乎痛哉兒早知其如此雖館金萬鎰兒亦不忍一日輟養而就也比年以來喜兒旋里家居養親杜門謝絕昕夕皈依母心稍慰乃以往年喪伯母繼年喪伯父丁亥秋兒媳宋氏又已病故母因而感傷悽痛欲絕遂違禮續娶曲從母命幸借新婦歡顏陶寫高堂懊惱築養園於宅東賴養親以館穀但保餘年亦又何求乃丙戌大水丁亥又水戊子又大水家室蕩然一洗無餘携家北來婚姻收卹母幾經顛播驚悸成病抑塞之餘時復忤忤斯時母之未幾於殆者亦僅矣母向有腿

疾自同治丙寅痊愈二十年來康健如初當母桑榆之年正兒喜懼之日跬步之間未敢少離去夏偶染時疫勿藥有喜私心兒竊計倘得假母數年俾不孝定省晨昏以補向來陔養之缺烏烏私情稍酬萬一詎以兒罪滔天降此大戾罔極之恩畢生莫報卽欲少盡旦夕之養而不可得也去秋八月胞妹函問至兒遍囑家人勿使噩耗入於母耳恐母聞知又增煩惱年老氣衰不耐感傷倘有不虞兒罪多矣一日母詔兒而告曰吾膝前止汝兄妹兩人汝妹命薄自作孫家婦使吾日在愁苦中然出嫁女終屬外家人吾不之慮所慮者不孝子耳三五年來寄人而食年柴月米積欠如山口腹累人終非了局吾年幾八旬兒亦五十餘矣兒女滿堂孫曾繞膝人生到此死亦何憾但以蕩析離居墳墓在百里外恐旦暮死令不孝子抱無涯之戚也兒時聞之以爲過慮由今思之知吾母日夜焦灼爲兒慮者誠深且至也嗚乎吾母言猶在耳呼天搶地痛不欲生嗚乎已矣長與不孝生死訣矣天何太酷人乎何尤嗚乎痛哉九原可作兒恨不得相從於地下耶今逢啟祭布奠傾觴母其有靈來格來嘗

哀哉尙饗

先妣潘太孺人殯期午祭文

嗚乎母往矣兒復何言千秋萬歲永隔重泉兒之罪誠上通於天矣嗚乎痛哉吾母慮兒身不成立夙夜不自安竟捨兒而長逝耶兒不才賦性頑鈍初識之無出就外傳母依戀不忍釋門閭之望無虛日偶自塾歸先君庭訓甚嚴督之不已則撻以記之兒每廢學母誡之曰汝忘爾父之責汝耶兒每受責母心滋戚兒痛雖止母淚猶未乾也兒時猶小當不復記憶少長雖能記憶亦未知其言之悲也此兒之不孝一也咸豐戊午冬兒年十八歲矣因縣試未拔前茅先君怒命之跪時夜過半母淚浸浸如雨下明年己未叨列黌首同治壬戌又領鄉薦今而後母喜可知也非喜兒之科第喜免先君鞭斥耳乃兒復不肖嗜酒疎狂仍時時觸父之怒使母焦心如故也此兒之不孝二也丙寅腊望先父見背母在床褥日侍藥湯苦塊餘生肺肝如裂朝夕號慟忽然忘生母每撫床而詔之曰爾父往矣不克復生承先啟後